

**MAHINUNG DANONG MGA PAMAHAYAG
ALANG SA 2024 THANKSGIVING BLENDING CONFERENCE**

**Bisag ang pangagamhanan sa Dios ang hisgotanan sa 1 ug 2 Pedro,
kinahanglan makita nato nga tanang may kalabotan sa pangagamhanan sa Dios
magdala gyod unta nato pagbalik sa sentrong tumong
ug sukaranong estruktura ning mga Sulata—
ang Tulo-usang Dios nga hingpit natong pagpahimulos
aron matuman ang pamatigayon sa Dios.**

**Ang pagkabililhon sa mga sinulat ni Pedro
mao nga giusa niya ang Cristohanong kinabuhi ug ang pangagamhanan sa Dios,
nagpadayag nga magkuyog gyod ang Cristohanong kinabuhi
ug ang pangagamhanan sa Dios ingog paris.**

**“Ang Dios sa tanang grasya”—nga nagtawag sa mga magtutuo
ngadto sa walay kataposang himaya Niya—maghingpit, mag-establisar,
maglig-on, ug magpasukad nila pinaagi sa ilang mga pag-antos;
kining “tanang grasya” mao ang “tinuod nga grasya sa Dios,”
nga sudlan ug barogan sa mga magtutuo.**

**Isip mga magtutuo ni Cristo,
mahimo tang hulad ni Cristo nga panig-ingnan nato
ug makasinati ug makapahimulos ta ni Cristo
nga Magbalantay sa atong kalag.**

**Mga Talamdan sa Mga Mensahe
alang sa Thanksgiving Blending Conference
Nobyembre 28—Disyembre 1, 2024**

**LINANGKOB NGA HISGOTANAN:
MAGKINABUHI SA CRISTO HANONG KINABUHI
UG IGLESIAHANONG KINABUHI DIHA SA PANGAGAMHANAN SA DIOS
ALANG SA PAMATIGAYON SA DIOS**

Mensahe 1

Ang Pangagamhanan sa Dios alang sa Pamatigayon sa Dios

Basahong Kasulatan: 1 Ped. 1:2-3, 5, 10-12, 20; 2:1-5, 9; 3:4; 4:14; 5:10; 2 Ped. 1:4; 3:13, 18

I. Ang hisgotanan sa Mga Sulat ni Pedro mao ang pangagamhanan sa Dios ug ang Iyang paghukom:

- A. Nagsugod sa mga manulonda ang paghukom sa Dios (2 Ped. 2:3-4) ug niagi sa mga kaliwatan sa tawo sa Daang Tugon (vv. 5-9).
- B. Sa panahon sa Bag-ong Tugon nagsugod kini sa balay sa Dios (1 Ped. 1:17; 2:23; 4:6, 17) ug magpadayon hangtod sa pag-abot sa adlaw sa Ginoo (2 Ped. 3:10), nga adlaw unya sa paghukom sa mga Judio, sa mga magtutuo, ug sa mga Gentil sa dili pa ang millennium (v. 12).
- C. Human sa millennium hukman ang tanang nangamatay, lakip na ang mga tawo ug mga demonyo, ug malaglag sila (1 Ped. 4:5; 2 Ped. 3:7), ug ut-uton sa kalayo ang mga langit ug ang yuta (vv. 10b, 12).
- D. Dili managsama ang mga resulta sa nagkadaiyang paghukom; dunay mga paghukom nga moresulta sa pagdisiplina, dunay moresulta sa iya-sa-dispensasyong silot, ug dunay moresulta sa walay kataposang pagkalaglag—2:1, nota 5, punto 2.
- E. Apan, pinaagi ning tanang paghukom hinloan ug putlion sa Ginoong Dios ang tibuok uniberso aron makabaton Siyag bag-ong langit ug bag-ong yuta alang sa bag-ong uniberso nga napuno sa Iyang pagkamatarong (3:13) aron malipay Siya.
- F. Makita sab sa basahon sa Daniel ang iya-sa-pangagamhanang paghukom sa Dios:
 1. Kay “nagmapahitas-on ang kasingkasing [ni Nabucodonosor] ug nagmapagarbohon kaayo ang iyang espiritu nga naggawi siya nga mapahitas-on, gipapahawa siya sa iyang harianong trono, ug gikuha gikan niya ang iyang himaya” (5:20); niingon ang Dios nga magpabilin gyod ang iyang gingharian sa “makaila na siya nga nagbuot gyod ang mga langit” (4:26; 5:21).
 2. Bisan nasayod si Belsazar nga iyang kaliwat ning tanan, ang pagpatuyang sa kahilayan niya insulto man sa pagkabalaan sa Dios, ug gisultian siya ni Daniel nga “wala mo pasidunggi ang Dios nga sa kamot Niya naa ang imong gininhawa ug ang tanan mong mga gawi” (vv. 22-23); busa, “gibahin na ang [iyang] gingharian ug gihatag sa mga Medianhon ug Persiahanon” (v. 28).
- G. Busa, giingnan ta ni Pedro nga kinahanglan “maggawi [ta] sa panahon sa inyong pagdumuluong diha sa kahadlok” (1 Ped. 1:17); niingon usab siya nga kinahanglan “magpaubos [ta] diha sa gamhanang kamot sa Dios aron ituboy mo Niya inig-abot sa panahon” (5:6); ang mosugot nga ipaubos sa makapaubos nga kamot sa Dios sa pagdisiplina Niya kanato kinahanglanon gyod aron ipataas ta sa makatuboy nga kamot sa Dios ug sa pagpahimulos nato sa Tulo-usang

Dios mismo nga sangkap nato sa kinabuhi, nga nisanay diha sa mapaubsanong magtutuo (v. 5; 1:2; 4:10).

- H. Ang pagkahadlok sa Ginoo pagkataha ug paghunahuna man Kaniya sa tanang butang (Sal. 86:11; Isa. 11:2; Prov. 1:7; 3:5-10), dili gyod makalimot nga Siya ang kahibulongang Dios nga naglalang nato (Isa. 43:7); ang pagkahadlok sa Ginoo mopugong nato sa pagbuhat og daotan; tungod niini matandog sab ta sa mga pag-antos sa uban ug magmaluluy-on ug magmapuangoron kanila.

II. Bisag ang pangagamhanan sa Dios ang hisgotanan sa 1 ug 2 Pedro, dili kini ang sentrong tumong ug sukaranong estruktura ning mga Sulata; tanang may kalabotan sa pangagamhanan sa Dios magdala gyod unta nato pag-balik sa sentrong tumong ug sukaranong estruktura ning mga Sulata—ang Tulo-usang Dios nga hingpit natong pagpahimulos aron matuman ang pamatigayon sa Dios:

- A. Ang sentrong tumong ug sukaranong estruktura sa 1 ug 2 Pedro mao ang nagpalagsik nga Tulo-usang Dios nga nagbuhat diha sa pamatigayon Niya aron madul-ong ang mga pinili Niya sa hingpit nga pagpahimulos sa Tulo-usang Dios; ang tawhanon natong espiritu, isip natagong tawo sa kasingkasing, ug ang Espiritu sa Dios, nga Espiritu sa himaya ug Espiritu ni Cristo, maoy palagianan nga makaambit ta sa Dios, sa diosnong kinaiya Niya, nga pahat nato—1 Ped. 1:2-3, 5, 11; 2:1-3, 5, 9; 3:4; 4:14; 5:10; 2 Ped. 1:4.
- B. Ang sentrong tumong ug sukaranong estruktura sa 1 ug 2 Pedro mao ang Tulo-usang Dios nga nagbuhat para mahuman ang kompletong kaluwasan Niya aron ipanganak ta pag-usab, aron mokaon ta sa Iyang pulong, ug aron motubo, matransporma, ug matukod ta aron makabaton Siyag puluy-anan ug mahimaya ta aron magpadayag Niya—1 Ped. 1:23; 2:1-5, 9.
- C. Walay kahadlok si Pedro nga niangkong nga ang unang mga apostol, sama nila ni Juan, Pablo, ug siya mismo (bisan naglahi sila sa ilang estilo, termino, pagsulti, ug pila ka aspeto sa ilang mga hunahuna, ug sa pinadaygan nila sa ilang mga pagtulon-an), niambit sa mao rang bugtong-talagsaong pagpangalagad, sa pagpangalagad sa Bag-ong Tugon—2 Ped. 1:12-21; 3:2, 15-16; 2 Cor. 3:6, 8-9; 4:1.
- D. Kanang pagpangalagara nangalagad sa katawhan, sa sentro niini nga si Cristo nga malangkobon-sa-tanan nga pagkalawas sa Tulo-usang Dios, nga human moagi sa kahikayan sa pagpakatawo, pagkinabuhi isip tawo, pagkalansang sa krus, pagkabanhaw, ug pagkayab, nagpaambit sa Iyang Kaugalingon pinaagi sa katubsanan ni Cristo ug sa pagbuhat sa Espiritu Santo ngadto sa tinubos Niyang katawhan ingon nga bugtong-talagsaon nilang pahat sa kinabuhi ug sangkap sa kinabuhi ug tanan, aron matukod ang iglesia nga Lawas ni Cristo, nga mahingpit sa bug-os nga pagpadayag, sa kahupnganan, sa Tulo-usang Dios, segun sa walay kataposang tuyo sa Amahan—Buh. 2:36; 3:13, 15; 10:36; 1 Ped. 1:2-3, 18-19, 23; 2:2-5, 7, 9, 25; 3:7; 4:10, 17; 5:2, 4, 10; 2 Ped. 1:2-4; 3:18.

III. Sa duha niya ka Sulat, nga naglangkob lag walo ka kapitulo, gihisgotan ni Pedro ang tibuok pamatigayon sa Dios, sugod sa nilabayng eternidad sa wala pa matukod ang kalibotan (1 Ped. 1:2, 20) hangtod sa bag-ong mga langit ug bag-ong yuta sa moabot nga eternidad (2 Ped. 3:13); gipadayag niya ang mahinungdanong mga butang kalabot sa pamatigayon sa Dios, bahin sa gipanagna sa mga propeta ug gisangyaw sa mga apostol (1 Ped. 1:10-12), gikan sa upat ka bahin:

- A. Sa bahin sa Tulo-usang Dios:

1. Gipili sa Dios Amahan ang usa ka katawhan sa eternidad sumala sa nahi-baloan na Niyang daan (vv. 1-2; 2:9) ug gitawag sila ngadto sa Iyang himaya (2 Ped. 1:3).
 2. Gitubos ug giluwat ni Cristo, nga naila nang daan sa Dios sa wala pa matukod ang kalibotan apan gipadayag sa kataposang mga panahon (1 Ped. 1:20), ang piniling katawhan Niya (vv. 18-19, 2) sa mapulihon Niyang kamatayon (2:24; 3:18) pinaagi sa Iyang pagkabanhaw diha sa kinabuhi ug pagkayab diha sa gahom (1:3; 3:21-22).
 3. Gibalaan ug giputli sa Espiritu, nga gipadala gikan sa langit, ang mga gitubos ni Cristo (1:2, 12, 22; 4:14)—nangandoy ang mga manulonda nga mosuta ning mga butanga (1:12).
 4. Gihatagan sa diosnong gahom sa Tulo-usang Dios sa tanang butang nga may kalabotan sa kinabuhi ug sa pagkadiosnon ang mga tinubos (2 Ped. 1:3-4) aron mabantayan sila hangtod hingpit na silang maluwas (1 Ped. 1:5).
 5. Gidisiplina sab sila sa Dios (5:6) sa nagkalainlain Niyang mga paghukom sa Iyang pangagamhanan (1:17; 2:23; 4:5-6, 17; 2 Ped. 2:3-4, 9; 3:7), ug hingpiton, establisaron, lig-onon, ug ipasukad Niya sila pinaagi sa tanang grasya Niya (1 Ped. 5:10).
 6. Mapailobon kaayo ang Ginoo kanila aron dunay higayon silang tanan nga maghinulsol para maluwas—2 Ped. 3:9, 15.
 7. Unya, motungha si Cristo diha sa himaya dala ang hingpit Niyang kaluwasan alang sa mga hinigugma Niya—1 Ped. 1:5, 7-9, 13; 4:13; 5:4.
- B. Sa bahin sa mga magtutuo:
1. Ang mga magtutuo, nga katigayonan sa Dios, gipili Niya (1:2; 2:9), gitawag sa Iyang himaya ug maayong gawi (v. 9; 3:9; 2 Ped. 1:3, 10), gitubos ni Cristo (1 Ped. 1:18-19), gipanganak pag-usab sa Dios pinaagi sa buhi Niyang pulong (vv. 3, 23), ug giluwat pinaagi sa pagkabanhaw ni Cristo (3:21).
 2. Gibantayan sila karon sa gahom sa Dios (1:5), giputli nga mahigugma sa usag usa (v. 22), nagtubo sa pagkaon sa gatas sa pulong (2:2), giugmad nila diha sa kinabuhi ang espihanong maayong kagawian (2 Ped. 1:5-8), ug gitransporma ug gitukod nga espihanong balay, usa ka balaang kahugpongan sa mga sacerdote nga moalagad sa Dios (1 Ped. 2:4-5, 9).
 3. Piniling kaliwat sa Dios sila, harianong kahugpongan sa mga sacerdote, balaang nasod, ug talagsaong katawhan nga kaugalingon Niyang katigayonan nga magpadayag sa maayong kagawian Niya—v. 9.
 4. Gidisiplina sila sa paghukom sa Iyang pangagamhanan (1:17; 2:19-21; 3:9, 14, 17; 4:6, 12-19; 5:6, 9), nagkinabuhi nga balaan ug sa labing maayong paggawi ug sa pagkadiosnon nga maghimaya Niya (1:15; 2:12; 3:1-2), nangalagad ingog maayong mga piniyalan sa nagkadaiyang grasya Niya aron mahimaya Siya pinaagi ni Cristo (4:10-11)—diha sa dalaygong pag-atiman sa mga anciano (5:1-4)—ug naglaom ug nagpadali sa pag-anhi sa Ginoo (1:13; 2 Ped. 3:12) aron madagayaong masangkapan sa pagsulod sa dayong gingharian sa Ginoo (1:11).
 5. Labot pa, nagpaabot sila sa bag-ong mga langit ug bag-ong yuta, diin magpuyo ang pagkamatarong, sa eternidad (3:13), ug mapadayonon silang nagtubo sa grasya ug sa pagkaila sa atong Ginoo ug Manluluwas nga si Jesucristo (v. 18).
- C. Sa bahin ni Satanas—kaatbang sa mga magtutuo si Satanas, ang yawa, nga sama sa leon nga nagnuglob nga naglibotlibot ug nangitag matukob—1 Ped. 5:8.

D. Sa bahin sa uniberso:

1. Gihukman na sa silot ang hulog nga mga manulonda ug naghulat sa walay kataposang paghukom (2 Ped. 2:4); gilaglag sa lunop ang karaang kalibotang dili diosnon (v. 5; 3:6); giugdaw ang dili diosnong mga syudad ug gihimong abo (2:6); hukman hangtod malaglag ang tanang mining magtutudlo ug mayubitong mga heretico sa apostasiya ug ang katawhan sa daotan niining pagkinabuhi (vv. 1, 3, 9-10, 12; 3:3-4, 7; 1 Ped. 4:5); sunogon ang mga langit ug ang yuta (2 Ped. 3:7, 10-11); ug hukman ang tanang tawong nangamatay na ug ang mga demonyo (1 Ped. 4:5).
2. Unya moabot ang bag-ong mga langit ug ang bag-ong yuta ingog bag-ong uniberso, diin magpuyo ang pagkamatarong sa Dios hangtod sa eternidad— 2 Ped. 3:13; itandi sa Isa. 1:26.

**Magkinabuhi sa Cristohanong Kinabuhi
diha sa Pangagamhanan sa Dios**

Basahong Kasulatan: 1 Ped. 1:17; 2:21-24; 4:17-19; 5:6

I. Naghisgot sa pangagamhanan sa Dios sa uniberso ang Mga Sulat sa 1 ug 2 Pedro:

- A. Ang hisgotanan sa 1 Pedro mao ang Cristohanong kinabuhi diha sa pangagamhanan sa Dios, nga nagpakita nato sa pangagamhanan sa Dios ilabi na sa mga pagtagad Niya sa pinili Niyang katawhan—1:2.
- B. Ang hisgotanan sa 2 Pedro mao ang diosnong sangkap ug ang diosnong pangagamhanan, nga nagpakita nato nga samtang nagdumala ang Dios kanato, nag-sangkap Siya sa tanan natong gikinahanglan—1:1-4; 3:13.
- C. Nagdumala ang Dios pinaagi sa paghukom; ang paghukom sa Dios para man sa pagtuman sa Iyang pangagamhanan—1 Ped. 1:17; 4:17:
 1. Kay kalabot man sa pangagamhanan sa Dios ang 1 ug 2 Pedro, balikbalik nga gihisgotan ning mga Sulata ang paghukom sa Dios ug sa Ginoo ingog usa sa mahinungdanong mga butang—1 Ped. 2:23; 4:5-6, 17; 2 Ped. 2:3-4, 9; 3:7.
 2. Pinaagi sa nagkalainlaing matang nga paghukom, hinloan ug putlion sa Ginoong Dios ang tibuok uniberso aron makabaton Siyag bag-ong langit ug bag-ong yuta alang sa bag-ong uniberso nga puno sa pagkamatarong Niya aron malipay Siya—v. 13.
- D. Dili umalabot nga paghukom ang paghukom sa 1 Pedro 1:17, nga gibuhat sa Amahan; kasamtangang inadlaw nga paghukom hinuon kini sa iya-sa-pangagamhanang mga pagbatok sa Dios sa Iyang mga anak:
 1. Gipanganak ta pag-usab sa Amahan aron magpalugwag balaang pamilya—balaang Amahan nga dunay balaang mga anak—vv. 3, 15, 17.
 2. Isip balaang mga anak, maggawi gyod ta sa balaang pagkinabuhi (vv. 15-16); kay kon dili, diha sa pangagamhanan Niya mahimong Maghuhukom ang Amahan ug mobatok sa atong pagkadili-balaan (4:15-17; Heb. 12:9-10).
- E. Magsugod sa balay sa Dios ang madisiplinahong paghukom sa pangagamhanan Niya—1 Ped. 4:17:
 1. Hukman sa Dios ang tanang dili mahiangay sa pangagamhanan Niya; busa, karong panahona, adlaw-adlawng gihukman sa Dios kitang mga anak Niya—1:17.
 2. Gigamit sa Dios ang daw kalayong mga pagsulay sa pagbatok sa mga magtutuo sa paghukom sa iya-sa-pangagamhanang administrasyon Niya, nga magsugod sa kaugalingon Niyang balay—4:12, 17.
 3. Ang tuyo ning paghukoma aron man magkinabuhi ta uyon sa Dios diha sa espiritu—v. 6.

II. Ang pagkabililhon sa mga sinulat ni Pedro mao nga giusa niya ang Cristohanong kinabuhi ug ang pangagamhanan sa Dios, nagpadayag nga magkuyog gyod ang Cristohanong kinabuhi ug ang pangagamhanan sa Dios ingog paris—1 Ped. 1:17; 2:21, 24; 3:15; 4:17; 5:5-8:

- A. Niagi nag taas nga kahikayan ang Tulo-usang Dios diha ni Cristo ug nahimo nang Espiritung taghatag-og-kinabuhi aron mopuyo nato; alang kini sa Cristohanon natong kinabuhi—Juan 1:14; 14:17; 1 Cor. 15:45b; 6:17.

- B. Sa samang higayon, Magbubuhay ug Magbubuot gihapon sa uniberso ang Tulo-usang Dios—1 Ped. 4:19.
- C. Bisag gipanganak na ta sa Dios aron makabaton og espirituhanong kinabuhi ug mahimong bag-ong binuhay, naa pa gihapon ta sa daang kabuhatan—Juan 1:12-13; 3:3, 5-6; 2 Cor. 5:17:
 - 1. Tungod niini, gikinahanglan nato ang iya-sa-pangagamhanang mga pagbatok sa Dios—1 Ped. 1:17.
 - 2. Aron motubo ang Cristohanong kinabuhi, gikinahanglan nato ang disiplina sa pangagamhanan sa Dios—2:2; 4:17; 2 Ped. 1:5-7.

III. Sa nia pa sa yuta si Ginoong Jesus, nagkinabuhi Siya sa tawhanong kinabuhi nga bug-os gyong nagpasakop sa pangagamhanan sa Dios, ug gitugyan Niya sa pangagamhanan sa Dios ang tanang may kalabotan Niya—Juan 6:38; 1 Ped. 2:21-23:

- A. Padayong gitugyan sa Ginoo ang tanang pagtamay ug kadaot nga nadawat Niya ngadto Niya nga matarong gyong naghukom diha sa Iyang pangagamhanan, sa matarong nga Dios, nga maoy gipasakopan Niya sa Iyang Kaugalingon; nisalig Siya ning Matarong, niila sa pangagamhanan Niya—v. 23.
- B. Sa dihang gitambagan sa Dios si Cristo ingog tawo, nausa sa Dios ang mga bahin ni Cristo sa sulod ug gitudloan Siya tungod sa pakigkontak Niya sa Dios—Sal. 16:7; Isa. 50:4.

IV. Isip mga magtutuo ni Cristo ug mga anak sa Dios, magkinabuhi gyod ta sa Cristohanong kinabuhi diha sa pangagamhanan sa Dios—Juan 3:15; 1:12-13; 1 Ped. 4:13-19; 5:6-8:

- A. Gipadayag sa Mga Sulat ni Pedro si Cristo nga makahimo nato nga makadawat sa iya-sa-pangagamhanang mga pagbatok sa Dios pinaagi sa mga pag-antos—1 Ped. 1:6-8; 2:3-4, 19, 21-25; 3:18, 22; 4:1, 15-16; 5:8-9.
- B. Maggawi gyod ta sa panahon sa atong pagdumuloong diha sa balaang kahadlok, sa ato pa, sa himsog ug seryosong pagmatngon nga magdala nato nga mabalaan sa tanang pagkinabuhi nato—1:15, 17.
- C. Magpaubos gyod ta diha sa gamhanang kamot sa Dios, nga nagtuman sa pangagamhanan Niya—5:6:
 - 1. Nagpasabot ang *gamhanang kamot sa Dios* sa versiculo 6 sa nagdumalang kamot Niya nga labi gyong makita diha sa paghukom Niya—1:17; 4:17.
 - 2. Kanang ipaubos diha sa gamhanang kamot sa Dios mao ang ipaubos sa Dios; ugaling mobulig gyod ta sa pagbuhay sa Dios ug kinabubut-ong magpaubos diha sa gamhanang kamot Niya—5:6.
- D. Itugyan gyod nato ang atong kalag sa matinumanong Magbubuhay—4:19:
 - 1. Makaamping ang Dios sa atong kalag, ug nag-uban ang mahigugmaon ug matinumanon Niyang pag-atiman sa hustisya Niya sa administrasyon sa Iyang pangagamhanan.
 - 2. Samtang naghukom ang Dios kanato diha sa Iyang pangagamhanan, matinumanon Siyang nag-atiman nato diha sa Iyang gugma; samtang nag-antos ta sa madisiplinahong paghukom Niya, itugyan gyod nato ang atong kalag sa matinumanong pag-atiman sa atong Magbubuhay—Mat. 10:28; 11:28-29.
- E. Sa kamatayon ni Cristo namatay ta ngadto sa mga sala aron diha sa pagkabanhaw Niya mabuhi ta ngadto sa pagkamatarong diha sa pangagamhanan sa Dios—1 Ped. 2:24:

1. Giestablisar ang pangagamhanan sa Dios diha sa pagkamatarong (Sal. 89:14a); isip katawhan sa Dios nga nagkinabuhi diha sa pangagamhanan Niya, magkinabuhi gyod ta sa matarong nga kinabuhi.
2. May kalabotan sa pagtuman sa mga gipangayo sa pangagamhanan sa Dios ang pamulong *mangabuhi ngadto sa pagkamatarong*—1 Ped. 2:24:
 - a. Giluwas ta aron matarong nga magkinabuhi diha sa pangagamhanan sa Dios, sa ato pa, magkinabuhi nga nahiangay sa matarong nga mga gipangayo sa pangagamhanan Niya.
 - b. Gigahin na ta gikan sa mga sala sa kamatayon ni Cristo, ug gibuhi ta sa pagkabanhaw Niya aron nga sa Cristohanon natong kinabuhi natural kaayo tang magkinabuhi ngadto sa pagkamatarong diha sa pangagamhanan sa Dios—Rom. 6:8, 10-11, 18; Efe. 2:6; Juan 14:19; 2 Tim. 2:11.

Kinabuhi ug Pagtukod sa Mga Sulat ni Pedro

Basahong Kasulatan: 1 Ped. 1:8; 2:1-5, 9; 2 Ped. 1:3-4

I. Ang sentrong hunahuna sa Mga Sulat ni Pedro ug sa tibuok Kasulatan mao ang kinabuhi ug pagtukod—1 Ped. 1:23; 2:2-5; 2 Ped. 1:3-4:

- A. Ang kinabuhi mao ang Tulo-usang Dios nga gipakalawas diha ni Cristo ug naamgohan ingon nga Espiritu nga nagpaambit sa Iyang Kaugalingon kanato aron mapahimuslan nato, ug ang pagtukod mao ang iglesia, ang Lawas ni Cristo, ang espirituhanong balay sa Dios, isip pagdako ug paglapad sa Dios aron hiniusang magpadayag Niya—Gen. 2:8-9, 22; Mat. 16:18; Col. 2:19; Efe. 4:16.
- B. Si Cristo nga binhi sa kinabuhi mao ang gahom sa kinabuhi sa sulod nato nga naghatag nato sa tanang butang nga may kalabotan sa kinabuhi ug pagkadiosnon aron matukod ang iglesia nga dagayang sobra sa kinabuhi ug pagpadayag sa kinabuhi pinaagi sa pagtubo ug pagkaugmad niini—2 Ped. 1:3-4; itandi sa Buh. 3:15; *Mga Alawiton*, #203, estansa 4.

II. Ang tumong sa Dios mao ang pagkabaton og espirituhanong balay nga tinukod sa buhing mga bato—1 Ped. 2:5:

- A. Isip kinabuhi nato, si Cristo ang binhing dili madunot; alang sa pagtukod sa Dios, Siya ang buhing bato—1:23; 2:4.
- B. Sa pagkakabig ni Pedro gihatagan siya sa Ginoo og bag-ong ngalan, nga Pedro—usa ka bato (Juan 1:42); sa napadaygan na si Pedro bahin ni Cristo, gipadaygan pa gyod siya sa Ginoo nga Siya ang dakong bato—usa ka bato (Mat. 16:18); tungod ning duha ka hitabo nasilsil sa panumdoman ni Pedro nga si Cristo ug ang Iyang mga magtutuo mga buhing bato alang sa pagtukod sa Dios (1 Ped. 2:4-8; Buh. 4:20; Isa. 28:16; Zac. 4:7).
- C. Kitang mga magtutuo ni Cristo, mga buhing bato nga hulad ni Cristo tungod sa pag-anak pag-usab ug pagtransporma; gilalang ta sa yutang kulonon (Rom. 9:21), apan sa pag-anak pag-usab kanato nadawat nato ang binhi sa diosnong kinabuhi, nga sa pagtubo na niini sa sulod nato nagtransporma nato nga buhing mga bato (1 Ped. 2:5).

III. Kay buhi man ang balay sa Dios, nagtubo kini; ang aktwal nga pagtukod sa iglesia nga balay sa Dios pinaagi man sa pagtubo sa mga magtutuo diha sa kinabuhi—Efe. 2:21:

- A. Aron motubo sa kinabuhi alang sa pagtukod sa Dios, mahigugma gyod ta sa Ginoo, manimati sa atong espiritu, ug magmatukawon gyong magbantay sa atong kasingkasing aron magpabilin ta sa dalan sa kinabuhi—1 Ped. 1:8; 2:2, 5; 3:4, 15; Prov. 4:18-23; Deut. 10:12; Mar. 12:30.
- B. Kon buot ta nga dili maulang ang kinabuhi ni Cristo sa sulod nato, mosinati gyod ta sa pagdugmok sa krus, sa makapatayng kamatayon ni Cristo diha sa malangkobon-sa-tanan nga Espiritu ni Cristo nga Espiritu sa himaya, aron mabatakan ug makuha ang mosunod nga mga kaulangan sa sulod nato—1 Ped. 1:11; 4:14; Sal. 139:23-24:
 - 1. Nagpasabot ang pagka-Cristohanon nga wala tay laing tumong gawas ni Cristo; ang kaulangan niini kana mang dili makaila sa dalan sa kinabuhi ug wala maghimo ni Cristo nga kinabuhi nato—Mat. 7:13-14; Fil. 3:8-14; Col. 3:4; Rom. 8:28-29.

2. Ang ikaduhang kaulangan mao ang pagminaot; dili matino ang pagkaespirituhanon sa tawo sa makitang panagway niya kondili sa pagtagad niya ni Cristo—Mat. 6:1-6; 15:7-8; Juan 5:44; 12:42-43; itandi sa Jos. 7:21.
 3. Ang ikatulong kaulangan mao ang pag-alsa; aktibo ug masiboton tingali kaayo ta sa pagbuhat og mga butang apan gibilanggo pa gihapon tingali nato ang buhing Cristo nga naa sa sulod nato ug wala mosugot Niya kay wala man nato Siya tagda—Lev. 14:9, 14-18; 11:1-2, 46-47; Rom. 16:17; 1 Cor. 15:33.
 4. Ang ikaupat nga kaulangan mao ang natural nga mga kahimoan nato; kon dili gihapon madugmok ang natural nga mga kahimoan nato, mahimo kining problema sa kinabuhi ni Cristo—2:14-15; 3:12, 16-17; Jud. 19; itandi sa Lev. 10:1-2.
- C. Aron motubo sa kinabuhi alang sa pagtukod sa Dios, isalikway gyod nato ang “tanang malisya ug tanang limbong ug mga pagminaot ug mga kasina ug tanang daotang sinultian”—1 Ped. 2:1.
- D. Aron motubo sa kinabuhi alang sa pagtukod sa Dios, magpatil-og gyod ta sa gatas sa pulong sa Dios nga walay sambog—v. 2:
1. Gipalatay sa pulong sa Dios ang gatas nga walay sambog aron motil-og sa pagkatawo nato sa sulod pinaagi sa pagsabot sa mabuot nga salabotan nato ug ihilis-sagol sa mga galamhan nato sa pangisip—Rom. 8:6; itandi sa Deut. 11:18.
 2. Bisan alang sa kalag pinaagi sa hunahuna ang masustansyang gatas sa pulong, sa kaulahian magtil-og kini sa espiritu, maghimo natong dili na kalagnon kondili espirituhanon, ug angayan nga tukoron nga espirituhanong balay sa Dios—itandi sa 1 Cor. 2:15.
 3. Aron makapahimulos sa gatas sa pulong, makatilaw sa Dios ug sa kaayo Niya diha sa pulong, dawaton gyod nato ang Iyang pulong pinaagi sa tanang pag-ampo ug mamalandong sa Iyang pulong—1 Ped. 2:3; Efe. 6:17-18; Sal. 119:15, 23, 48, 78, 99, 148:
 - a. Ang pagpamalandong sa pulong pagtilaw ug pagpahimulos man niini pinaagi sa mabinantayong paghunahuna—1 Ped. 2:2-3; Sal. 119:103.
 - b. Ang pag-ampo, pagpamulong sa kaugalingon, ug pagdayeg sa Ginoo mahimo sab nga ilakip sa pagpamalandong sa pulong; ang pagpamalandong sa pulong “pag-usap-usap” man, pagdawat sa pulong sa Dios pinaagi sa daghang paghunahuna pag-usab—Lev. 11:3.
 4. Sa pagkaon nato ni Cristo nga masustansyang gatas nga naa sa pulong, motubo ta hangtod hingpit nga maluwas, mahamtong pinaagi sa pagkatransporma aron mahimaya; may kalabotan sa pagkatransporma alang sa pagtukod sa Dios ang kaluwasan sa 1 Pedro 2:2.
 5. Nagpahimulos ta sa “gatas-Cristo” nga magtil-og nato aron matransporma ta pinaagi Niya nga “bato-Cristo” ug matukod nga “Lawas-Cristo,” nga espirituhanong balay sa Dios ngadto sa balaang kahugpongan sa mga sacerdote—vv. 2-4; 1 Cor. 12:12-13.

IV. Ang balaang kahugpongan sa mga sacerdote, ang nagtambayayongay nga kapunongan sa mga sacerdote, mao ang natukod nga espirituhanong balay; gusto ang Dios og espirituhanong balay nga Iyang kapuy-an ug sacerdotehanong kapunongan, kahugpongan sa mga sacerdote, nga moalagad Niya—1 Ped. 2:5; Exo. 19:5-6:

- A. “Kaliwat [ta] nga pinili, harianong kahugpongan sa mga sacerdote, balaang

nasod, katawhang nabatongan ingon nga katigayonan” (1 Ped. 2:9)—nagpasabot ang *kaliwat nga pinili* nga kaliwat ta sa Dios; ang *harianong kahugpongan sa mga sacerdote*, sa pag-alagad nato sa Dios; ang *balaang nasod*, sa pagkakatilingban nato nga alang sa Dios; ug ang *katawhang nabatongan ingon nga katigayonan*, sa pagkabililhon nato sa Dios.

- B. Ang hiniusang sacerdotehanong pag-alagad nato pagmantala man ingog ebanghelyo sa maayong kagawian Niya nga nagtawag nato gikan sa kangitngit ngadto sa Iyang kahibulongang kahayag (v. 9) aron “maghalad [tag] espirituhanong mga halad nga hinangponon sa Dios pinaagi ni Jesucristo” (v. 5b); kining espirituhanong mga halad mao kini:
1. Si Cristo nga realidad sa tanang halad-inihaw sa mga hulagway sa Daang Tugon, sama sa halad nga sinunog, halad nga kalan-on, halad sa pakigdait, halad tungod sa sala, ug halad tungod sa paglapas—Lev. 1—5.
 2. Ang mga makasasala nga naluwas sa pagsangyaw nato sa ebanghelyo, nga gihalad ingog mga bahin ni Cristo—Rom. 15:16.
 3. Ang atong lawas, ang atong mga pagdayeg, ug ang mga butang nga gibuhad nato alang sa Dios—12:1; Heb. 13:15-16; Fil. 4:18.
- C. Maggikan gyod unta sa Ginoo ang tanang sacerdotehanong pag-alagad nato Niya nga mao “ang Dios nga nagsukod” ug dili sa atong kaugalingon; segun gyod unta sa paggiya ug paglimiti Niya ang tanang sacerdotehanong pag-alagad nato, samtang gipabuhad nato sa atong sulod ang Iyang kamatayon, aron ikapaambit ang kinabuhi Niya sa pagkabanhaw pinaagi nato ngadto sa uban—2 Cor. 10:13; Juan 12:24; 21:15-22; 2 Sam. 7:18, 25, 27; Luc. 1:37-38; *Mga Alawiton*, #907.

**Mahimong Hulad ni Cristo
ug Magsinati ni Cristo nga Magbalantay sa Atong Kalag**

Basahong Kasulatan: 1 Ped. 2:21-23, 25; Mat. 11:28-30; Fil. 1:27; 2:2

I. Isip mga magtutuo ni Cristo, mahimo tang hulad ni Cristo nga panig-ingnan nato—1 Ped. 2:21:

- A. Ang pagkinabuhi ni Ginoong Jesus diha sa pangagamhanan sa Dios usa ka panig-ingnan aron mosunod ta sa Iyang mga lakang pinaagi sa pagkahimo natong hulad Niya—vv. 21-23; Efe. 4:20-21.
- B. Ang Griyegong pulong sa *panig-ingnan* sa 1 Pedro 2:21 nagpasabot sa orihinal nga kopya nga gigamit sa pagtudlo sa pagsulat—kopyahanan sa pagsulat, pagsulat nga sinubay, nga gigamit sa mga estudyante sa pagsubay sa mga letra samtang nakat-on sila sa pagsulat niini:
 - 1. Gipakita ni Ginoong Jesus kanato ang Iyang kinabuhi ingon nga pagsulat nga sinubay aron makopya nato kini sa pagsubay ug pagsunod nato sa Iyang ginawian—Mat. 11:28-30.
 - 2. Dili tuyo sa Dios nga maningkamot ta sa pag-awat ni Cristo pinaagi sa kaulingon natong pagpaningkamot; dili pag-awat ang gikinahanglan nato kondili paghulad—Rom. 8:29; 2 Cor. 3:18.
- C. Mahimo gyod tang hulad ni Cristo, mga kopya ni Cristo, pinaagi sa kahikayang naglakip sa kadato sa diosnong kinabuhi; sa mahuman na kining kahikayana, mahimo tang hulad ni Cristo—Juan 3:15; Efe. 3:8.
- D. Magamit ang paghimog mga kopya sa paghulagway sa gipasabot ni Pedro nga nahimo si Cristo nga panig-ingnan nato.
- E. Aron mahimong hulad ni Cristo nga panig-ingnan nato, sination gyod nato si Cristo nga maoy nabuhi sa sulod nato, gihulma sa sulod nato, ug nagbalay sa atong kasingkasing—Gal. 2:20; 4:19; Efe. 3:16-17a:
 - 1. Gipadayag sa Bag-ong Tugon nga nalambigit gyod pag-ayo si Cristo sa tawo nato sa sulod—Gal. 1:16; Col. 3:10-11.
 - 2. Nabuhi sa sulod nato—ang pneumaticong Cristo—si Cristo nga Espiritung taghatag-og-kinabuhi—1 Cor. 15:45b; Gal. 2:20:
 - a. Ang pamatigayon sa Dios mao nga ilansang gyod sa krus ang “ako” diha sa kamatayon ni Cristo ug nabuhi si Cristo sa sulod nato diha sa Iyang pagkabanhaw—Juan 14:19.
 - b. Usa ta ka espiritu sa Ginoo, usa ang kinabuhi nato Kaniya, ug mausa gyod ta ka persona Kaniya karon—1 Cor. 6:17; Col. 3:4; Fil. 1:21a.
 - c. Kay nagpuyo man si Cristo sa sulod nato ingon nga Espiritu, pakinabuhion gyod nato Siya sa sulod nato—Juan 14:16-19; Gal. 2:20.
 - 3. Ang pagkahulma ni Cristo sa sulod nato kana mang mahingkod si Cristo sa sulod nato—4:19:
 - a. Gipanganak si Cristo nganhi nato sa paghinulsol ug pagtuo nato Kaniya, unya nabuhi Siya sa sulod nato sa atong Cristohanong kinabuhi, ug sa kataposan, mahulma Siya sa atong sulod sa pagkahamtong nato—Juan 1:12-13; 3:15; Gal. 2:20; 4:19.
 - b. Ang pagkahulma ni Cristo sa sulod nato kana mang maokupahan sa malangkobon-sa-tanan nga Espiritu ang tanang bahin sa tawo nato sa sulod, kanang mahingkod si Cristo sa sulod nato—Col. 2:19; Efe. 4:15-16.

- c. Ang pagkahulma ni Cristo sa sulod nato nagpasabot nga organico tang maumolan ni Cristo—Col. 3:10-11.
- d. Ang *mahulma* sa Galacia 4:19 nitakdo sa *dagway* sa 2 Corinto 3:18; mahulma si Cristo sa sulod nato aron mapadayag nato Siya sa Iyang dagway.
- 4. Si Cristo nga nabuhi sa sulod nato ug gihulma sa sulod nato nagbalay man sa atong kasingkasing—Efe. 3:16-17a.
- 5. Samtang nabuhi sa sulod nato, nahulma sa sulod nato, ug nagbalay si Cristo sa atong kasingkasing, mahimo tang hulad Niya aron hiniusang mapadayag ang Dios—Rom. 8:29; 12:4-5; Bug. 21:2.

II. Sa mahimo tang hulad ni Cristo, makasinati ug makapahimulos ta ni Cristo nga Magbalantay sa atong kalag—1 Ped. 2:25; Mat. 11:28-30; Fil. 1:27; 2:2:

- A. Isip Magbalantay sa atong kalag, naglantaw ang pneumaticong Cristo sa kahimtang nato sa sulod, nagtagad sa sitwasyon sa tawo nato sa sulod:
 - 1. Ang organicong pagpangatiman ni Cristo labi gyong nagtagad sa atong kalag—Sal. 23:3.
 - 2. Giatiman ta ni Cristo sa pag-atiman Niya sa kaayohan sa atong kalag ug sa paglantaw Niya sa kahimtang sa tawo nato sa sulod—itandi sa Heb. 13:17.
 - 3. Sulodnon, tiunay, kun organicong paglipay kining matanga sa pagpangati-man.
- B. Kay makuti man kaayo ang atong kalag, nagkinahanglan ta ni Cristo, nga mao ang Espiritung taghatag-og-kinabuhi nga naa sa atong espiritu, nga moatiman sa atong kalag, magtagad sa atong hunahuna, pagbati, ug pagbuot ug sa atong mga problema, mga panginahanglan, ug mga samad—Juan 14:16-17; 1 Cor. 15:45b; 6:17:
 - 1. Isip pneumaticong Magbalantay nato, giatiman ta ni Cristo sa kinahiladman sa atong espiritu.
 - 2. Nagsugod ang Iyang pagpangatiman sa atong espiritu ug nikaylap sa tanang bahin sa atong kalag.
 - 3. Gikan sa atong espiritu moabot si Cristo sa tanang bahin sa atong kalag ug malumo, organico, ug malangkobon-sa-tanan nga moatiman nato.
- C. Isip Magbalantay sa atong kalag, gipahiuli ni Cristo ang atong kalag—Sal. 23:3a:
 - 1. Kanang mapahiuli ang atong kalag nagpasabot nga madasig ta pag-usab.
 - 2. Ang pagpahiuli sa atong kalag naglakip sab sa pagpabag-o ug pagtransforma—Rom. 12:2; 2 Cor. 3:18.
- D. Isip Magbalantay sa atong kalag, papahulayon sa Ginoo ang atong kalag—Mat. 11:28-30:
 - 1. Gitawag sa Ginoo ang mga naningkamot nga motuman sa kasugoan o naningkamot nga magmalamposon sa bisan unsang buhat nga moduol Niya aron makapahulay—v. 28.
 - 2. Kini nga pahulay dili lang nagpasabot nga nakagawas sa paghago ug luwan ubos sa kasugoan o relihiyon o sa bisan unsang buhat ug kaakohan, kondili sa hingpit sab nga kalinaw ug bug-os nga katagbawan.
 - 3. Ang pagsangon sa yugo sa Ginoo pagdawat man sa kabubut-on sa Amahan—12:50.
 - 4. Nagkinabuhi ang Ginoo sa ingon niana nga kinabuhi, nagpapugong ug nagtagad sa kabubut-on sa Iyang Amahan (Juan 4:34; 5:30; 6:38); bug-os Siyang natagbaw sa kabubut-on sa Amahan ug nakapahulay sa Iyang kasingkasing.
 - 5. Ang pahulay nga makaplagn nato sa pagsangon nato sa yugo sa Ginoo ug

pagkat-on Kaniya pahulay man sa sulod, pahulay sa atong kalag—Mat. 11:29-30.

- E. Sa giatiman ug gipasig-uli sa Ginoo ang atong kalag, dili lang ta makasinati ni Cristo kondili makapahimulos sab Niya—Fil. 2:2; 3:1a:
1. Naa gyod sa atong espiritu ang pagsinati kang Cristo, apan naa sa atong kalag ang pagpahimulos kang Cristo—1:27; 2:2.
 2. Kon dunay problema sa atong kalag, makasinati tingali ta ni Cristo apan dili ta makapahimulos Niya.
 3. Bahin ni Cristo, naa gyod sa atong kalag ang pagtilaw nato; mao nga aron makapahimulos ta ni Cristo, nagkinahanglan ta sa Ginoo nga moatiman sa tanang bahin sa atong kalag, ilabi na sa atong hunahuna.

Ang Grasya sa Mga Sulat ni Pedro

Basahong Kasulatan: 1 Ped. 1:2b, 10, 13; 2:19-20; 3:7; 4:10; 5:5, 10, 12; 2 Ped. 1:2; 3:18

- I. Ang grasya mao si Cristo mismo nga pagpahimulos nato—kini ang nabanhawng Cristo nga Espiritung taghatag-og-kinabuhi nga naghatag sa Iyang Kaugalingon kanato sa walay bayad, nahimong tanan nato, ug nagbuhat sa tanan diha nato, pinaagi nato, ug alang nato—Juan 1:14, 16-17; Isa. 55:1; 2 Cor. 1:8-9, 12; Gal. 2:20; itandi sa 1 Cor. 15:10.**
- II. Ang pagdagaya sa grasya mao ang grasyang nidagaya sa inadlaw natong kinabuhi sa hingpit nga pagkaila nato sa Dios ug ni Jesus nga atong Ginoo; dato, nidagaya, ug daghan ang grasya sa Dios sa pamatigayon Niya—1 Ped. 1:2b; 2 Ped. 1:2; Juan 1:16; Efe. 1:6-8; 2:7; Rom. 5:17, 21; 1 Tim. 1:14; Bug. 22:21:**
 - A. Modagaya ang grasya kanato pinaagi sa atong mga pag-antos, mga paglimiti, ug mga kaluyahon; ang grasya mao si Cristo nga tigpas-an sa luwan nato; labi kadaghan ang atong luwan, maglabi kadaghan sab ang kahigayonan nga makasinati ta ni Cristo nga grasya—2 Cor. 12:7-9; itandi sa 1:12, 15.
 - B. Ang pagpahimulos sa Ginoo nga grasya naa niadtong nahigugma Niya—Efe. 6:24; Juan 21:15-17; 1 Ped. 1:8.
 - C. Ang pagpahimulos sa Ginoo nga grasya lakip na sa diosnong kinaiya Niya pinaagi man sa pagdawat ug pagpabilin nato sa pulong sa Iyang grasya, nga naglakip sa tanang hamili ug hilabihan kadagkong mga saad Niya—Buh. 20:32; 2 Ped. 1:4; Efe. 6:17-18.
- III. Nanagna ang mga propeta sa Daang Tugon bahin sa grasyang moabot kanato—1 Ped. 1:10:**
 - A. Gipatin-aw sa Espiritu ni Cristo sa mga propeta sa Daang Tugon ang kalabot ni Cristo nga moabot ingon nga grasya nganhi nato pinaagi sa Iyang pagpakatawo, sa mga pag-antos Niya sa Iyang pagkinabuhi isip tawo ug pagkalansang sa krus, ug mga himaya Niya sa Iyang pagkabanhaw, pagkayab, ikaduhang pag-anhi, ug paghari aron ikaaplikar kanato ang hingpit nga kaluwasan sa Dios—vv. 5, 9-10; itandi sa Sal. 22; Isa. 53; Dan. 9:26.
 - B. Bisan tuod iya-sa-dispensasyong giumpul ang Espiritu ni Cristo tungod sa ug pinaagi sa kamatayon ug pagkabanhaw ni Cristo sa panahon sa Bag-ong Tugon (Juan 7:39; Rom. 8:9-11), walay kataposan ang kagamitan sa Espiritu ni Cristo, kay Siya man ang walay kataposang Espiritu (Heb. 9:14).
 - C. Naa sa mga propeta sa Daang Tugon ang Espiritu ni Cristo, sa walay kataposang kagamitan Niya, nagpatin-aw kanila kalabot ni Cristo nga moabot sa mga magtutuo sa Bag-ong Tugon aron mahimong igo-sa-tanan ug walay kinutobang grasya sa hingpit nga kaluwasan sa Dios para nila aron makasulod sila sa kalipay sa Ginoo sa panahon sa gingharian, nga mao ang kaluwasan sa ilang kalag—Juan 1:17; Heb. 10:29b; 1 Ped. 1:9; Mat. 25:21, 23.
 - D. Giaplikar sa Espiritu ni Cristo ang hingpit nga kaluwasan sa Dios isip grasya nato pinaagi sa duha ka palagianan: sa pagpanagna sa mga propeta sa Daang Tugon ug sa pagsangyaw sa mga apostol sa Bag-ong Tugon—1 Ped. 1:10-12; itandi sa Bug. 2:7a.
- IV. Ang grasyang hingpit nga gilaoman sa mga magtutuo ipadangat unya kanila inigpadayag na ni Jesucristo—1 Ped. 1:13:**

- A. Ang grasyang ipadangat kanato inigpadayag na ni Jesucristo nagpasabot sa kaluwasan sa kalag nga kahingpitan sa hingpit nga kaluwasan sa Dios—vv. 5, 9-10:
 - 1. Ang grasyang gihatag kanato diha ni Cristo gihatag man kanato sa wala pa magsugod ang kalibotan—2 Tim. 1:9; Tito 2:11.
 - 2. Ang Dios, nga naa na sa sinugdan, nahimong unod sa panahon isip grasyang madawat, mapanag-iya, ug mapahimuslan sa tawo—Juan 1:1, 14, 16-17.
 - 3. Ang nahikay nga Tulo-usang Dios, nga nahingpit nga Espiritung malangkobon-sa-tanan, taghatag-og-kinabuhi, ug nagpuyo-sa-sulod, nahimo nang Espiritu sa grasya nga naa sa atong espiritu—1 Cor. 15:45b; 2 Cor. 3:17; Heb. 10:29; Gal. 6:18; Fil. 4:23.
- B. Bukas gyod unta tang mga sudlanan adlaw-adlaw aron mahimong makanunayong mga tigdawat sa grasya ug bug-os ug hingpit gyod tang molaom ning grasya—Rom. 5:17; 1 Ped. 1:13.

V. Nagpasabot ang grasya uban sa Dios sa 1 Pedro 2:19-20 sa pagdasig sa diosnong kinabuhi sa sulod nato ug ang pagpadayag niini sa atong pagkinabuhi, nga nahimong puno-sa-grasya ug hinangponon sa panan-aw sa tawo ug sa Dios sa paggawi nato:

- A. Ang grasya nga mao ang nahikay nga Tulo-usang Dios nga kapahimuslan nato nahimong pagdasig nato sa sulod ug pagpadayag nato sa gawas sa suod nga pakig-ambitay nato sa Dios ug sa pagkamabinantayon nato Niya; kat-onan gyod natong tanan nga makabaton og grasya, nga mao ang pagdawat, pagpanag-iya, paggamit, ug pag-aplikar sa grasya—Heb. 12:28.
- B. Ang nahikay nga Tulo-usang Dios nga grasyang nadawat ug napahimuslan nato madayag man ug makita sa uban diha sa balaang pagkinabuhi nato ug sa mga tigom sa iglesia—Buh. 11:23.
- C. Gitawag ta aron magpahimulos ug magpadayag ni Cristo nga grasya diha sa mga pag-antos aron mahimo tang hulad, kun xerox copy, ni Cristo nga sumbanan nato, uyon sa Dios-tawong pagkinabuhi Niya—1 Ped. 2:20-21.

VI. Ang grasya sa kinabuhi mao ang panulundon sa tanang magtutuo, kusganon ba siya o maluyahon—3:7:

- A. Ang grasya sa kinabuhi mao ang Dios nga kinabuhi ug sangkap sa kinabuhi nato diha sa Diosnong Trinidad Niya—sa Amahan nga tinubdan sa kinabuhi, sa Anak nga agianan sa kinabuhi, ug sa Espiritu nga agay sa kinabuhi, nga niagay sa sulod nato, uban sa Anak ug sa Amahan, ingon nga grasya nato—Juan 7:38-39; Bug. 22:1.
- B. Mga manununod ta nga manunod sa grasya sa kinabuhi ug mga sudlanan nga sudlan sa grasya sa kinabuhi—1 Ped. 3:7; Efe. 1:14; 2 Cor. 4:7.

VII. Nagpakita ang nagkadaiyang grasya sa Dios sa kadato sa grasya Niya sa nagkadaiyang aspeto niini nga gipangalagad sa mga balaan sa usag usa—1 Ped. 4:10:

- A. Ang nagkadaiyang grasya sa Dios mao ang datong sangkap sa kinabuhi, nga mao ang Tulo-usang Dios nga gipangalagad kanato sa daghang aspeto—2 Cor. 13:14; 12:9.
- B. Mahimo unta tang maayong mga piniyalan sa nagkadaiyang grasya sa Dios, nga mamulong sa mga pulong sa grasya ingog mga oraculo sa Dios ug mangalagad tungod sa kusog ug gahom sa grasya, nga gisangkap sa Dios—1 Ped. 4:10-11; Luc. 4:22; Efe. 3:2; 4:29.

VIII. Naghatag ang Dios og grasya sa mga mapaubsanon apan nagsanta Siya sa mga mapahitas-on—1 Ped. 5:5:

- A. Diha sa iglesiahanong kinabuhi baksan gyod natong tanan ang atong kaugalingon sa pagpaubos ngadto sa usag usa aron makapahimulos ta sa Dios nga Taghatag-og-grasya—itandi sa Juan 13:3-5.
- B. Magluwas nato sa tanang matang sa pagkadaot ug magpadangat sa grasya sa Dios ang pagpaubos, samtang maghimo natong numero unong buang ang garbo—Sant. 4:6; Sal. 138:6; Prov. 29:23.
- C. Andam unta tang ipaubos diha sa gamhanang kamot sa Dios sa pagdisiplina Niya ug itugyan ang atong kinabuhi lakip na ang tanang kabalaka niini ngadto sa Dios, kay mahigugmaon ug matinumanon man Siyang nagtagad nato—1 Ped. 5:5-7; itandi sa Sal. 55:22.

IX. Ang Dios sa tanang grasya—nga nagtawag sa mga magtutuo ngadto sa walay kataposang himaya Niya—maghingpit, mag-establisar, maglig-on, ug magpasukad nila pinaagi sa ilang mga pag-antos; kining “tanang grasya” mao ang “tinuod nga grasya sa Dios,” nga sudlan ug barogan sa mga magtutuo—1 Ped. 5:10, 12.

X. Ang tinuod nga grasya sa Dios mao ang grasyang tuboan sa mga magtutuo nunot sa pagkaila sa atong Ginoo ug Manluluwas nga si Jesucristo, ngadto sa Iyang himaya karon ug ngadto sa adlaw sa eternidad—2 Ped. 3:18:

- A. Kini ang panghinapos nga pulong sa mga sinulat ni apostol Pedro, nagpakita nga iya sa, diha sa, gumikan sa, ug pinaagi sa grasya sa Dios ang tanang gisulat niya.
- B. Ang lugwa sa grasya diha sa pamatigayon sa Dios mao ang Lawas ni Cristo nga balak sa Dios nga mahimong Bag-ong Jerusalem nga kahingpitan sa pagkamatatung sa Dios sa bag-ong mga langit ug bag-ong yuta—Efe. 2:7-10; 2 Ped. 3:13.
- C. Dili malimitihan ang kadato sa grasya sa Dios, ang kadato sa Dios mismo nga atong mapahimuslan ug ipasundayag kini sa eternidad—Efe. 2:7.

**Mga Umalambit sa Diosnong Kinaiya
ug ang Pag-ugmad sa Diosnong Kinabuhi
ug Diosnong Kinaiya
aron Datong Makasulod sa Walay Kataposang Ginghamarian**

Basahong Kasulatan: 2 Ped. 1:1, 3-11; 3:18

- I. Isip mga tawong nakadawat na sa sama kahamiling pagtuo, mahimo gyod untang mga umalambit sa diosnong kinaiya kitang mga magtutuo ni Cristo—2 Ped. 1:4:**
- A. Nagpasabot ang diosnong kinaiya sa pagkamao sa Dios, sa ato pa, sa kadato, mga elemento, ug mga bahin sa pagkamao sa Dios—Juan 4:24; 1 Juan 1:5; 4:8, 16.
 - B. Dili mabulag ang diosnong kinabuhi ug diosnong kinaiya; ang diosnong kinaiya maoy unod sa diosnong kinabuhi ug naa kini sa diosnong kinabuhi—1:1-2; 5:11-13.
 - C. Kay mga anak man sa Dios, mga Dios-tawo ta, nga gipanganak sa Dios, naka-baton sa kinabuhi ug kinaiya Niya, ug mga kaliwat sa Dios—3:1; Juan 1:12-13:
 - 1. Sa pagpanganak pag-usab kanato, gipaambit kanato ang laing kinaiya; kini ang kinaiya sa Dios, ang diosnong kinaiya—2 Ped. 1:4.
 - 2. Kay naa man sa diosnong kinabuhi ang diosnong kinaiya, naay diosnong kinaiya ang diosnong kinabuhi nga nag-anak pag-usab kanato—Juan 3:3, 5-6, 15.
 - 3. Bisan kinsang nituo ngadto sa Anak sa Dios gipanganak sa Dios ug dunay katungod nga mahimong anak sa Dios; busa, dunay katungod ang magtutuo nga moambit, magpahimulos, sa kinaiya sa Dios—1:12-13.
 - D. Ang umalambit sa diosnong kinaiya mao kadtong nagpahimulos ug niambit sa diosnong kinaiya—2 Ped. 1:4:
 - 1. Ang pag-ambit sa diosnong kinaiya pagpahimulos man sa pagkamao sa Dios; ang pagkaumalambit sa diosnong kinaiya pagkaumalambit man sa kadato, mga elemento, ug mga bahin sa pagkamao sa Dios—1 Ped. 1:8.
 - 2. Kon buot tang mahimong mga umalambit sa diosnong kinaiya, magkinabuhi gyod ta sa diosnong kinabuhi nga naay diosnong kinaiya—Juan 1:4; 10:10; 11:25; 6:57b.
 - E. Makapahimulos ta sa kadato sa diosnong kinaiya pinaagi sa hamili ug hilabihan kadagkong mga saad sa Dios—2 Cor. 12:9; Mat. 28:20b; Efe. 3:20.
 - F. Dunay kondisyon ang pagkaumalambit sa diosnong kinaiya—maglikay ta sa pagkadunot nga naa sa kalibotan tungod sa pangibog; magkinabuhi gyod ta diha sa tuyok sa paglikay ug pag-ambit ug sa pag-ambit ug paglikay—2 Ped. 1:4.
 - G. Kon magpahimulos ta sa Dios ug moambit sa kadato sa Iyang pagkamao, ma-umolan ta sa diosnong kinaiya, masama sa Dios sa kinabuhi ug kinaiya apan dili sa ranggo sa pagka-Dios ug magpadayag Niya sa tanang pagkamao ug buhaton nato—v. 3.
 - H. Samtang nag-ambit ta sa diosnong kinaiya, nagpahimulos sa tanang pagkamao sa Dios, hingpit gyong maugmad ang kadato sa diosnong kinaiya, ingon sa gisay-say sa mga versiculo 5 hangtod sa 7.
- II. Mosinati gyod ta sa pag-ugmad sa diosnong kinabuhi ug diosnong kinaiya nga naa sa diosnong binhi nga gisabod na kanato aron dato tang makasulod sa walay kataposang ginghamarian—vv. 1, 4-11:**

- A. Gibahinan na ta sa kahibulongan nga sama kahamiling pagtuo, ug malangko-bon-sa-tanan nga binhi kining pagtuoha—v. 1:
 1. Naa ning binhia ang tanang diosnong kadato, apan magmakugihon gyod ta sa pag-ugmad niini; ang pagtubo hangtod mahamtong pag-ugmad man sa naa na nato—vv. 1-8; 3:18.
 2. Sa pag-ugmad nato ning mga maayong gawi, motubo ta sa kinabuhi, ug sa kaulahian mahamtong ta, mapunog Cristo, ug maangayan ug masangkapan nga mahimong mga hari sa moabot nga gingharian—Efe. 4:13-15; Col. 2:19; 2 Ped. 1:11.
 3. Duna gyod unta tay hingpit nga pagkaugmad ug pagkahamtong gikan sa binhi sa pagtuo, pinaagi sa mga gamot sa maayong gawi ug kahibalo, sa punoan sa pagpugong-sa-kaugalingon, ug sa mga sanga sa pagkamainantoston ug pagkadiosnon, hangtod sa bulak ug bunga sa gugmang inigsoon ug gugma—vv. 5-7.
- B. Ang pagsangkap og maayong gawi sa pagtuo pag-ugmad man sa maayong gawi—ang kusog sa diosnong kinabuhi nga moresulta sa kusog nga buhat—sa paggamit sa sama kahamiling pagtuo; gamiton gyod kining pagtuoha aron maugmad ang maayong gawi sa diosnong kinabuhi sa sunod nga mga lakang ug mahamtong—v. 5a.
- C. Nagkinahanglan ang maayong gawi sa madagayaong sangkap sa kahibalo sa Dios ug ni Jesus nga atong Ginoo; ang kahibalong ugmaron gyod nato sa maayong gawi nato naglakip sa kahibalo kun pagkaila nato sa Dios ug sa atong Manluluwas, sa kahibalo sa pamatigayon sa Dios, sa kahibalo kon unsa ang pagtuo, ug sa kahibalo sa diosnong gahom, himaya, maayong gawi, kinaiya, ug kinabuhi—v. 5b.
- D. Ang pagpugong sa kaugalingon pagpugong man sa kaugalingon bahin sa mga pagbati, tinguha, ug batasan niini; buhaton gyod kanang pagpugonga nga may kahibalo aron dunay hustong pagtubo sa kinabuhi—v. 6a.
- E. Ang pagkamainantoston pagpailob man nato sa uban ug sa mga sirkumstansya—v. 6b.
- F. Ang pagkadiosnon pagkinabuhi man nga sama sa Dios ug nagpadayag Niya—v. 6c.
- G. Ang gugmang inigsoon (*philadelphia*) mao ang pagbating inigsoon, ang paghigugmang maila sa kalipay ug kahimuot; diha sa pagkadiosnon, nga nagpadayag sa Dios, isangkap gyod kining gugmaha alang sa mga igsoon, alang sa panghimatuod nato sa kalibotan, ug sa pagpamunga—v. 7a; 1 Ped. 2:17; 3:8; Gal. 6:10; Juan 13:34-35; 15:16-17.
- H. Ang kinahingpitang pagkaugmad sa diosnong kinaiya nga naa sa sulod nato mao ang gugma—*agape*, ang Griyegong pulong nga gigamit sa Bag-ong Tugon alang sa diosnong gugma, nga mao ang Dios sa kinaiya Niya—2 Ped. 1:7b; 1 Juan 4:8, 16:
 1. Ugmaron pa gyod ang gugmang inigsoon nato aron mahimong mas halangdon ug mas habog nga gugma—2 Ped. 1:7b.
 2. Sa pagpahimulos nato sa diosnong kinaiya, ugmaron gyod nato ang diosnong binhi sa gipahat nga pagtuo hangtod mahingpit kini diha sa diosnon ug mas halangdong gugma—vv. 5-7.
 3. Kon moambit ta sa diosnong kinaiya sa kinahingpitan gyod, mapuno ta sa Dios nga gugma, ug mahimo tang mga tawo sa gugma, gugma man ngani mismo—Efe. 3:19.

- I. Maglig-on sa pagtawag ug pagpili sa Dios kanato ang pag-ugmad sa espirituhanong maayong mga gawi diha sa diosnong kinabuhi ug tungod niana moabante sa pagtubo sa diosnong kinabuhi—2 Ped. 1:10.
- J. Magmakugihon gyod ta sa pagpursigir sa pagtubo ug pag-ugmad sa diosnong kinabuhi ug diosnong kinaiya aron dato tang makasulod sa walay kataposang gingharian—vv. 10-11:
 - 1. Ang dagayang sangkap nga gipahimuslan nato sa pag-ugmad sa diosnong kinabuhi ug diosnong kinaiya (vv. 3-7) madagayaong magsangkap nato aron dato tang makasulod sa walay kataposang gingharian sa atong Ginoo.
 - 2. Kining sangkapa ang maghimo ug magpaangayan nato nga makasulod sa moabot nga gingharian pinaagi sa tanang kadato sa diosnong kinabuhi ug diosnong kinaiya isip labaw kaayong mga maayong gawi (kusog) nato ngadto sa masilakong himaya sa Dios—v. 3; 1 Ped. 5:10.
 - 3. Morag kitay mosulod sa walay kataposang gingharian; sa pagkatinuod, datong isangkap kanato ang pagsulod sa walay kataposang gingharian pinaagi sa pagtubo nato sa kinabuhi ug sa pagkaugmad sa diosnong kinabuhi nga naa nato.